

SUURAT AL-MUDDATHHIR:

*Magaca Eebe yaan ku bilaabaynaa ee Naxariis guud
iyo mid gaaraba Naxariista.*

- 1. (Nabiga) Isdadayow*
- 2. Istaag oo dig*
- 3. Eebahaana waynee*
- 4. Dharkaagana daahiri*
- 5. Xumaantana ka hijroo (iyo sanamyada)*
- 6. Hana ku mannaysan Adoo Badsan (waxaad Bixisay)*
- 7. Eebahaa Dartiisna u Samir*
- 8. Marka Suurka (qiyaame) la Afuufo*
- 9. Maalintaasu waa maalin ku Daran*
- 10. Gaalada oon u Fududayn*
- 11. Isukaanna daa Aniga iyo kaan Abuuray isaga oo kaligiisa*
- 12. Una yeelay Xoolo Badan*
- 13. Iyo Wilaal Jooga oo (Darban)*
- 14. Aan una waasiciyay Risqiga*
- 15. Oo haddana sii damci inaan u Badiyo*
- 16. Saas ma aha, ee kaas wuxuu diiday Aayaadkannaga*
- 17. Waxaana ku kallifi (ku Dhibi) Cadaab daran*

Waxaa sugnaatay in rasuulku (Naxariis iyo Nabadgalyo Eebe korkiisa ha yeele) markuu waxyigu ku billaawday uu is daday isagoo naxsan markaas Eebe faray inuu kaco dadkana u digo, Eebana wayneeyo nadaafadana ku dadaalo, Xumaantana ka fogaado, wuxuu bixiyana uusan sheegsheegin, dar Eebana u samro, mu'minka dhabta ahna saasaa laga rabaa, markase qiyaamadu timaaddo gaalo waxay la kulmi dhib iyo halaag, mana habboona in Eebihii ku abuuray ee kuu nicmeeyay eed waliba ka doonayso kordhin aad ka gaalawdid xaqiisana ka madax adaygtid, sida gaalka aayaduhu tilmaameen.

18. Gaalkaasu wuu Fikiray waxbuuna Goostay

19. Waxaana loo Lacnaday Siduu wax u goostay

20. Haddana waxaa loo Lacnaday siduu wax u goostay

21. Kadib wuxuu Eegay (si uu Quraanka u wax yeeleeyo)

22. Wuuna Waji Macbuusay oo Uruuriyay

23. Markaasuu jeedsaday oo is Kibriyay

24. Isagoo Dhihi quraankani ma aha waxaan sixir la soo Guuriyay ahayn

25. quraankaani ma aha waxaan hadal Bashar ahayn

26. waxaannu galin kaas (Naarta) saqara

27. Ma taqaannaa Naarta Saqara

28. Hilib iyo laf midna ma Reepto

29. waxayna Doorisaa jidhka (oy Gubtaa)

30. waxaana kor jooga (ka shaqeeya) sagaal iyo toban malag (ama saf)

Sharaxda Suurrada (2)

Xaqoo la raaco yaa haboo, Ruuxiise ka Horyimaada oo Xumaan iyo dhagar maamula wuxuu la kumi dhibaato iyo guul darro, sidii ku dhacday gaalkii

Waliid Binu Muqiira ahaa ee dulloobay laguna dilay dagaalkii waynaa ee Badar, Eebana wuxuu ugu goodiyay kaas iyo wixii camalkiisa fala naar daran oo laf iyo lud midna aan reebaynin, mall'igtuna waa junuudda Eebe ee naarta ka shaqeysa si loo ciqqaabo dambiilayaasha, Eebe ha naga koriyee.

31. Ugama Aannaan yeelin naarta kuwa ka shaqeeya maa'ig, tirana uma aannaan yeelin inay Gaaladu ku fidnoobaan Mooyeen, iyo inay yaqiin sadaan kuwa Kitaabka la siiyay, iyo inay kordhistaan kuwa xaq Rumeeyay limaan, ayna shakiyinna kuwii Kitaabka la siiyay iyo Mu'miniintu, iyo inay Dhahaan kuwa Qalbiga ka buka iyo Gaaladu Eebe muxuu uga Jeedaa Tusaalahan, saasaa Eebe u dhumiyaa Ruuxuu Doono, una Hanuuniyaa Ruuxuu Doono, wax og junuuda Eebe oon isaga Ahaynna ma jiro, waxan la soo Sheegayna ma aha waano Dadka Mooyee

32. Waxaa sugan dayaxa ku Dhaartaye

33. Iyo Habeenku Markuu Jeedsado

34. Iyo Subaxu markuu iftiimo

35. Ee Naarta Saqara waa waxyaalaha waawayn Midkood (Balaayooyinka)

36. Waana Digniinta Dadka

37. Ruuxii Doona inuu Hormaro, iyo Ruuxii Doona inuu dib u dhaco (waa Loodigay)

Sharaxda Suurrada (3)

Eebe wuxuu doonuu falaa, naarta cidda ka shaqaynna wuxuu ka dhigay malaa'ig, si ciddii doontana ay u hanuunto ciddii doontana u dhunto, junuudda Eebeheen iyo ciidammadiisana isaga umbaa og, aayadaha la soo sheegayna waa digniinta dadka, Eebaha wuxuu ku dhaartay dayaxa, habeeku markuu jeedsado, subaxu markuu iftiimo in Naarta Saqara ay ka mid tahay Balaayoo yinka waawayn iyo digniinta dadka ruuxii doona inuu hormaro iyo kii doona inuu dib udhacaba. Kitaabu-Baxar waxaa lagu sheegay in horumarka iyo dibu dhaca loola jeedo khayrkoo lagu hormaro iyo isagoo laga dib dhaco. Ibnu Cabbaasna wuxuu yidhi Ruuxii doona ha raaco daacada Eebe, kii doonana ha ka dib dhaco.

38. *Naf walba waxay u xidhantahay waxay Camal fashay*
39. *Hase yeeshee kuwa Midigta Mari (Ehlu khayrka)*
40. *Waxay gali Jannooyin, waxayna iswaydiin*
41. *Dambiilayaasha*
42. *Iyagoo ku dhihi Maxaa idin Galiyay Naarta saqara*
43. *Waxayna ugu Jawaabi ka mid ma' aannaan ahayn kuwa Tukada*
44. *Mana aannaan ahayn kuwa Quudiya Miskiinka*
45. *Waxaana ahayn kuwa la dhumbada kuwa xumaanta Dhumban*
46. *Waxaana ahayn kuwa beeniya Maalinta Abaalmarinta (Qiyaamada)*
47. *Ilaa ay Dhabt u Nooga Timaado (Geeridu)*
48. *Ma anfacayso kuwaas Shafeecada kuwa Shafeeca*
49. *Maxaase u sugnaaday oy waanada uga jeedsadaan*
50. *ood u moodaa Dameero Diday*
51. *oo ka Cararay libaax*
52. *Haddana wuxuu dooni midkasta oo ka mida warqado Qoran (kitaab)*
53. *Saas ma aha Ee kama yaabayaan Aakhiro*
54. *Waxaa sugan in Quraanku waana yahay*
55. *Ruuxii Doona yaana waantoobi*
56. *Mana waantoobayaan in Eebe Doona Mooyee, Eebana wuxuu mutaa in laga Dhawrsado, wuxuuna Ehel u yahay inuu Dambi Dhaafo.*

Sharaxda Suurrada (4)

Naf walba waxaa laga abaal marin waxay kasbatay, khayr iyo sharba, hase yeeshee ehlu jannuhu waxay waydiin ehlu naarka waxa naarta galiyay, waxayna ugu jawaabi: inayna tukan jirin, miskiina quudin jirin, xumaantana tiimban jireen, qiyaamadan beenin jireen inta dhabetu uga timaaddo, kuwaas shafeeco wax uma tarto, maxaayeelay xaqay ka jeedsadeen iyagood mooddo dameero bahal ka cararay, haddana midkastoo ka mida gaalada wuxuu dooni in warqad samada looga soo dajiyo, dhabahaantuse waa inayna aakhiro ka yaabaynin, Quraankuna waana yahay, ruuxii doonana waantoobi, awoodana Eebaha in laga cabsado muta dambi dhaafna ehel u ah yaa iska leh.